

## † Rusina Valier, Camischolas GR 20-242

(Corr.) Tgi che ha enconuschiu la Rusina Valier ha ella en memoria sco femna da lavur, temperament e humor. Ils davos onns eis ei denton vegnii ruasseivel entuorn ella muort ina maligna malsogna che ha schizun privau ella bunamein da tutta vesida. Questa primavera ha ella – ultra da quei – aunc pigliau ina daguota, aschia che la mort ei stada per ella ils 27 da fenadur el spital da Glion in levgiament.

La Rusina Valier ei naschida ils 11 da mars 1915 sco feglia dil vier Paul Schmid e dad Augustina, nata Riedi. Gia ella vegliadetgna da treis onns miera sia mumma dalla nauscha grippa che ha era pretendiu diversas autras unfrendas a Tujetsch. Quei ei stau ina greva frida per la giuvna famiglia. Enzacons onns suenter ma-

rida il bab puspei, aschia ch'il sulegl ha entschiet a sclarir danovamein en la casa da Paul Schmid. Stada ord scola, va la Rusina adina sut sco casarina en differentas plazzas era ordeifer la Val.

Igl onn 1944 marida ella il Luis Valier, da Camischolas. Damai che siu mariu lavura entochen 1956 els hotels sco concierge, sto la Rusina sesvolver il bia persula cun ses 4 affons. Denton sco femna luvrusa e curaschusa vegn ella bein a frida cun sias obligaziuns. Insumma eis ella stada ina femna che stueva adina trafficar enzatgei. Mo la lavur a casa cuntentava buca ella. Perquei ha ella entschiet a far quei e tschel, cura che siu um ha calau dad ir per ils hotels. Ella metta neu in pèr cauras e nuorsas, hanlegia cun purschals e va era a marcau giu Glion, ed ina piazza emprova ella schizun da far fatschentas cun schnecs. Per 13 onns surpren ella il restaurant a Cungieri ed in pèr onns administrescha ella in kiosk a Sedrun. Malgrad quella gronda activitat ha ella buca schau engadir sia famiglia.

Era tier la Rusina han las varts umbrivaunas buca muncau: Igl emprem pop miera da baret. Ina greva frida munta la mort dalla feglia Agnes, che sto bandunar gia cun 20 onns quest mund entras ina maligna malsogna. — Ussa ei era la mumma ida «sur cuolm» ella patria celestiala nua che tutta suffrientscha cala si. Alla famiglia en malencurada nossa profunda condolentscha!

